

a quodam fratre Matheo de Grabow ordinis Predicatorum, professo conventus Wismariensis dyoc. Razeburgensis provincie Saxonie (f. 35') tamquam hereticalis et heresim sapiens, erroneus, scandalosus, iniuriosus, temerarius, presumptuosus et piarum aurium offensivus, set et aqua angustie sustentandus donec appareret, an in luce an in tenebris ambularet. Compulsus quoque predictum libellum cum suis conclusionibus publice revocare, si ad unitatem ecclesie eligeret redire. Si vero non elegisset, degradandus ut hereticus fuerat, et brachio seculari relinquendus. Eidem quoque fratri M. quoad vixerit¹ interdictus est accessus ad provinciam Coloniensem, maxime ad dyoc. Traiectensem, sub pena perpetue incarcerationis et aliis iuris penis. Principium libelli fuit tale: 'Suppono primo quod non intendo', finis vero: 'Et per hoc patet responsio ad decimum'. Prima eiusdem libelli conclusio fuit hec: 'Nullus potest licite et meritorie, immo nec veraciter, obediencie, paupertatis et castitatis universalia consilia coniunctim extra veras religiones manendo adimplere'. Ultima eius conclusio scilicet 17. fuit ista: 'Ex quibus sequitur, quod predicta tria Salvatoris consilia sunt ita concathenata, ut ubi paupertas veraciter seu meritorie invenitur, oportet quod necessario obediencia et castitas veraciter seu meritorie inveniantur'.

Revocacio eiusdem fratris Mathei.

Ego frater Matheus Grabow, ordinis Predicatorum professus conventus Wismariensis dyoc. Razeburgensis provincie Saxonie, cognoscens veram catholicam et apostolicam sedem, anathematizo et abiuro omnem heresim omnemque falsam et erroneam doctrinam contentam in quodam meo libello incipiente 'Suppono' etc. et finiente 'et per hoc patet responsio ad decimum', maxime 17 conclusiones pretensas et asserciones, quarum alie sunt heretice, alie erronee et alie scandalose ac piarum aurium offensive, per me editas in illo, de qua doctrina hactenus infamatus (f. 36) convictus et sentencialiter condemnatus sum. Et consentio sancte Romane ecclesie et apostolice sedi, profitens eandem fidem me tenere et credere, quam sancta ecclesia tradidit et firmavit, et iurans per sanctam Trinitatem et hec Christi evangelia, eos qui contra hanc

1) 'vixit' Hs.